



PRIMEIRO
MINISTRO

**DISKURSU BADAQ HOSI SUA ESELÊNSIA PRIMEIRU-MINISTRU
DR. RUI MARIA DE ARAÚJO
IHA BIBAN SERIMÓNIA INAUGURASAUN UMA FOUN
ESKOLA “AMIGOS DE JESUS”**

Díli
04 fevereiru 2017

Eselênsias,

Señor Prezidente Parlamentu Nasional
Señor ex-Titular Órgaun Soberania nian sira
Membru Parlamentu Nasional no kolega membru Governu sira
Reverendíssimu Bispu Díli, Baucau no Maliana

Reprezentante Korpu Diplomátiku sira
Reverendu Amu João Felgueiras
Reverendu Amu no Reverenda Madre sira
Reprezentante Konfissaun Relizioja no Sosiedade Sivil nian sira

Exmo. Señor sira
Inan-aman, professor, profissional edukasaun nian no alunu sira

Señora no señor sira!

Ha'u sente ksolok tebes hodi bele hakat mai hamutuk ho Ita Boot sira, iha fatin ida ne'e, no hamutuk ho imi hotu-hotu atu selebra inaugurasan uma foun Eskola "Amigos de Jesus".

Sai motivu ksolok ida duni hanesan, tuir poeta portugés ida hakerek, "Maromak hakarak, Ita ema mehi, obra sira moris". No tanba ema ida mehi, maka Eskola "Amigos de Jesus" moris (hikas). Ema ida mehi ne'e maka ita nia belun murak Amu Jezuíta João Felgueiras, ne'ebé ema barak hatene ho naran Amu Felgueiras, ha'u husu atu ita hotu basa liman ba nia.

Amu Felgueiras uluk kedas to'o oras ne'e hamutuk no la fahe-malun ho ninia kolega jezuíta ida Amu José Alves Martins, nebe la'os deit hanesan belum boot timor-oan hotu-hotu nian maibe mos ba Povu Timor-Leste tomak, liu-liu hanesan "kapelaun" boot ida hodi haknar-an iha afirma identidade Povu no Nasaun Timor nian. Karik ha'u la haluha, katak hori tinan 46 to'o oras ne'e, maka ita hetan ninia dedikasan no empenhu hodi serbi ba Povu no Nasaun Timor no, kona-ba biban ida ne'e, liu-liu iha área ensinu no formasan nian.

Tebes, katak Eskola ne'ebé ita oras ne'e inaugura, maka hanesan riku-soi heransa nian hosi vontade ida maka'as tebes no hosi hahalok ida ne'ebé metin iha edukasan hosi Amu Felgueiras, hodi hatudu desde iha semináriu "Nossa de Fátima" iha Dare, sai ba "Externato de São José" nebe ha'u mos hetan sorte hodi sai nu'udar alunu hosi jezuíta boot na'in rua ne'e, no iha pontu ás liu, iha tinan 1997, hodi sai "embriaun" ba Eskola "Amigos de Jesus", nebe ema timor-oan barak bele desenvolve sira nia eskolaridade no kapasidade intelektual sira.

No projektu edukasan Amu Felgueiras nian ne'e nunka lakon forsa. Hanesan prova maka Eskola ida ne'e, nia merese duni, sai hanesan homenajem ida ba ninia ninia dedikasan no ba ninia haka'as-an iha edukasan iha ita nia país.

Edukan maka rin sentral desenvolvimentu ba sosiedade no tanba ne'e maka setor edukasan nafatin sai hanesan prioridade ida iha asan Governu nian. Edukan maka

fator importante liu atu individu bele hakut ba oin iha ambiente inkluzivu ida, ho dame, ho liberdade, ho justisa sosial, no horik iha sosiedade ida demokrátiku. Liu tan ida ne'e, edukasaun kontribui nafatin ba oin hodi hamenus moris kiak, eskluzaun sosial, sentimentu injustisa, inkompreensaun sira no konfliktu sira.

Gabinete Apoiu ba Sosiedade Sivil to'o oras ne'e servisu ho kolaborasaun ida besik tebes ho organizasaun sosiedade sivil no konfissaun relizioja sira, hodi bele haforsa parseria ho Governu. Ami fiar katak representante hotu-hotu sosiedade sivil nian hala'o ona papel dida relevante tebes iha akompaña polítika Governu nian sira, hodi kontribui ba hadi'a kondisaun moris povu nian.

Tuir dalan ida ne'e, no iha ámbitu ninia intervensaun hodi apoia ba dezvoltamentu iha ensinu eskolár no akadémiku, hodi garante kondisaun sira no kualidade ba prátika edukativa no pedagójika, maka Gabinete Apoiu ba Sosiedade Sivil fo ona apoiu finanseiru ba Fundasaun Komunitade "Amigos de Jesus" iha projektu ida ne'e relasiona ho loka tan Eskola "Amigos de Jesus".

Edifísiu foun ida ne'e, ho laboratóriu, biblioteca, sala hirak própriu ba dezvoltar atividade kriativa nian sira, enfermaria, we mos no rekreiu-fatin, bele fo kondisaun hirak di'ak liu ba alunu no ba profissional edukasaun nian sira, hodi kontribui tebes ba susessu ida boot liu bainhira simu koñesimentu.

Bainhira haboot tan Eskola "Amigos de Jesus", maka ida ne'e halo fatin sira bele garante beistár ema hotu ne'ebé frekuente Eskola ne'e, nune'e mos kondisaun hirak iha asessu ba koñesimentu ho modu interativu, hodi adapta teknolojia informasaun no komunikaun hirak foun, hodi promove prátika pedagójika di'ak no bele fo ambiente ida seguru no inkluzivu.

Iha Estadu ida ne'ebé sei nurak, hanesan ita nia Estadu, maka organizasaun sociedade sivil sira la'os deit kaer papel importante ida iha polítika no prátika edukasaun nian sira maibe mos dezempeñu ida fundamental hanesan ema servisu na'in edukasaun nian.

No Eskola ida ne'e sai sentru ida ne'ebé ho nível ás duni, projektu ida ne'ebé ho kualidade, sustentabilidade, no ho solusaun ambiental no fungsional hirak ne'ebé bele hamenus ninia kustu ba jestaun no manutensaun.

Sentru ida ho nível ás tebes ne'ebé bele promove prátika iha ensinu eskolár obrigatóriu no halo Governu iha orgullu atu financia projektu ne'e. Hein katak projetu edukativu hirak ho nível ás hanesan ne'e labele sai fali kastelu eskluzivismu hirak ne'ebé la presija ba ema lubuns ki'ik-oan ida, maibe tenke sai "we-nalibun ida iha rai maran fuik" ba problema edukativu nian sira ne'ebé maka ita nia país hasoru, no atu bele sai ezemplu ba edukasaun iha ita nia país, edukasaun ida ne'ebé bele forma prepara ema-boot feto-mane timor-oan iha futuru nebe bele dedika sira nia an hodi serbi Povu no Nasaun, hodi hakut tuir ezemplu Amu Felgueiras nian.

Molok atu remata, ha'u hakarak atu hato'o rahun-kmanek no agradese ba sira hotu ne'ebé maka hamutuk ho Amu Felgueiras iha projektu ida ne'e, hanesan ezemplu Amu Martins, ne'ebé maka fo ona mai ita ai-han laran-badinas no gratidaun nian, no ba sira hotu ne'ebé direta ka indireta kontribui ona ba obra ne'ebé ohin ita inaugura no atu riku-soi heransa nian ne'e bele hatutan ba jersaun sira.

Parabéns ba imi hotu no votus susessu!

Kmanek-wa'in.

04 fevereiru 2017

Dr. Rui Maria de Araújo